
Title	Sasterawan 1: Pendapat
Author(s)	Muhammad Ariff bin Ahmad

Copyright © Muhammad Ariff bin Ahmad

sasterawan 1.

Pendapat:

Kebetulan dalam majalah ini ada diperkatakan orang tentang adat kahwin orang Melayu yang dianggap oleh setengah2 orang terpelajar sebagai suatu perbuatan boros dan merugikan; dan kebetulan pula terbitnya 'sasterawan' nomor ini hampir menjelang bulan Rabi'al-Awal yang biasanya menjadi permulaan musim orang2 kita bekerja kahwin, maka topik 'pendapat' kali ini sengaja saya pilih yang ada kena mengena dengan Perkahwinan Orang2 Melayu.

Benarkah istiadat bersanding itu merupakan punchak kebudayaan orang2 Melayu? Jika benar, apakah persandingan itu dapat menyatakan kewibawaan atau keperibadian atau dapatkah ia menggambarkan tentang keadaan hidup orang Melayu seluruhnya? Apakah yang menyebabkan orang2 Melayu sanggup berbelanja besar2an – malah ber-habis2an – untuk satu majlis kerja kahwin seperti yang selalu kita saksikan di mana2 orang Melayu berada. Kadang2 kita dengar ibubapa terpaksa bergadai, atau berhutang (walaupun hanya berhutang kepada sharikat kerjasamanya sendiri) untuk menyempurnakan kerja kahwin anaknya.

Apakah kerja kahwin yang dibuat sechara besar2an itu memberi menafaat kepada diri dan keluarga malah masarakat pengantin2 itu? Atau se-kurang2nya, besarnya angkatan kerja kahwin itu dapat menjamin bahwa pasangan suami isteri itu akan hidup aman tenteram ber-kasih2an seumur hidupnya? Apakah majlis besar2an itu dapat menyatakan hakikat sebenarnya sesuatu perkahwinan itu? Dan malah banyak lagi soal2 yang boleh kita pikirkan tentang perkahwinan kita.

Masanya sudah sampai untuk kita menyedari hakikat hidup bertanding dengan lain2 manusia yang hidup sewilayah, sezaman dan sekeadaan dengan kita. Zaman yang serba realistic memaksa kita hidup dan berpikir sechara realistik. Kita, sebagai umat Islam, dianjurkan supaya berhijrah – mungkin dari tempat ke tempat, atau dari masa ke masa, atau dari keadaan ke keadaan – yang lebih baik, lebih sempurna untuk menchapai kesejahteraan hidup sebagai manusia. Kebudayaan membedakan keadaan manusia dan keadaan lain2 mahluk dengan ukuran bahwa manusia mengatur hidupnya dengan kecherdasan, kepintaran dan kekuasaan akal nya, sedang lain2 mahluk (binatang dan tumbuh2an) hidupnya menurut tradisi seperti yang biasa dialami oleh keturunan2nya yang sebelumnya.

Manusia kahwin, binatang2 dan tumbuh2an juga kahwin; tetapi manusia kahwin dengan aturan2 yang diatur sesuai dengan tempat, masa dan keadaan manusia, sedang binatang dan tumbuh2an kahwin se-mata2 mengulangi pengalaman keturunannya yang sebelumnya saja. Oleh karena kita termasuk dalam golongan manusia perlulah soal perkahwinan kita itu kita pikirkan semula supaya hakikat perkahwinan kita dapat kita chapai. Sechara mudah hakikat perkahwinan itu bukanlah untuk mem-buang2 uang; bukanlah untuk menunjukkan kita berada kalau sebenarnya kita tidak berada; bukanlah untuk menjamu sekalian orang yang kita kenal dalam dunia ini; tetapi hakikat perkahwinan itu yalah untuk menjalin kasih-sayang yang dianugerahi

Tuhan itu antara seorang manusia dengan manusia lain, antara satu keluarga dengan keluarga yang lain dan untuk menurunkan keturunan yang bakal menguasai alam ini selama hidupnya dalam keadaan yang sejahtera dan berbahagia – sesuai dengan peribahasa patah tumbuh hilang berganti.

Saranan yang menganjurkan supaya kita memulakan chara kahwin beramai2 mungkin dapat menjimatkan belanja, tetapi mungkinkah itu satu jalan keluar yang praktikal bagi kita untuk menemui hakikat kahwin yang tulen? Setakat ini, belumlah meyakinkan. Pikiran hendak kahwin be-ramai2 itu sudah tumbuh sejak tahun 50an dulu – duapuluh tahun sudah! Tapi belum teramalkan lagi. TV Singapura yang mempunyai anggota lebih dari 1,600 orang (tentulah lebih dari 800 orang muda-mudinya) dapat menggerakkan initiative memulakan langkah itu dengan mendaftarkan anggota2nya sendiri menjadi calon pasangan kahwin beramai2 itu.

Kalau Kesatuan Guru2 kurang terdaya, mungkin Majlis Pelajaran Melayu yang dianggotai oleh 51 pertubuhan Melayu di Singapura ini dapat menganjurkannya. Jika tidak juga mungkin Lembaga Tetap Kongres yang dipimpin oleh budayawan2 Melayu, atau Majlis Pusat dimana berhimpun para intelek Melayu harus dapat membuka jalan bagi satu chara perkahwinan orang2 Melayu yang dapat mencapai hakikat perkahwinan yang tulen. Satu chara kahwin yang realistik, tidak membazir dan akan menguntungkan semua pihak harus kita chari sekarang.

- Mas.